



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma : Tir Yimym

tiryimym@aolima

tir yimym

TAPAK 8

CMP ka nung ajemdaker opposition longjemtsüla: Sharad Pawar

Racism atalokdang football asaya anendaktsüner: FIFA tir

VOL. XX NO. 244 (ADOK 244)

DIMAPUR

KÜPTOKNÜ (SATURDAY)

AAMI (JUNE) 17, 2023

₹ 5.00

## Nagaland nung U-WIN atema arangshir

**Kohima, June 16, 2023 (TYO):** Nagaland nung 58% immunization dang asüba agi Department of Health and Family Welfare-i Training of Trainers (ToTs) indang sentong ka ayonga agir.

Iba ya linük nung Unorganised Workers' Identification Number (U-WIN) maparen tajungba inyaktsü atema lir.

U-WIN sabang ya COWIN database nung ajemdaka lir aser iba ya India nung COVID-19 vaccination programme atema "digital backbone" ama liasü.

U-WIN sabang ajanga mashisa aliba tetsür, kinü tanur asoba, tanur aser tainlonglongtem vaccination atema metetsü, ta Mission Director, National Health Mission, Nagaland, Dr Ritu Thurr-i ashi.

India sorkari senso ajak asoshi health & safety atema bilemstür aser iba atema basic & essential services agütsür, ta pai ashi.

Electronic Vaccine Intelligence Network (eVIN) aser Covid Vaccine Intelligence Network (COWIN) angazükba aser iba ajanga inyaktsü ajanga Universal Immunization Programme (UIP)/ COVID vaccines tajungba ketdangtsü. Iba atema Ministry of Health & Family Welfare-i eVIN aser COWIN sabangtem akangshitsü atema U-WIN sabang tenzüker, ta Dr. Thurr-i metetdaksü.

U-WIN ya Ayushman Bharat Digital Mission (ABDM) ama renema lir aser iba ajanga Healthcare Professional Registry (HPR), Healthcare Facility Registry (HFR) aser Ayushman Bharat Health Account (ABHA)

sendakteper, ta paisa ashi.

Mashisa tetsürtem aser tanurtem atema Ayushman Bharat Health Account (ABHA) ID den sendaktepa aliba vaccine acknowledgement aser immunisation card adoktsü. State aser district ajak indang külem database ka alitsü aser iba ajanga track & vaccinate asütsü akok, ta Dr. Thurr-isa ashi.

Nagaland-i pilot districts ana-Dimapur aser Peren nung U-WIN tenzüker aser iba ajanga vaccination system ajanga digitized asür. U-WIN ya August ita nungi tanungba district ajak nung tenzütsü ta paisa shisem.

Nagaland indang overall immunization coverage ji 58% lir saka tanungba state temibo 75% tongogo. Anungji Nagaland nung immunization coverage ya küm ka tsüngda 75% atongtsü merangtsüla, ta Dr. Thurr-isa metetdaksü.

Nagaland nung Non-Communicable Disease (NCD) kanga bulua akümer anungji immunization ketdangtsürtemi hypertension, diabetes aser cancer putetertem jungjunga bendentsüla, ta paisa mepishia metetdaksü.

"Tarutsü anogotem technology amshia State immunization coverage tajungba akümsü imlar" ta State Immunization Officer, Dr Imkong Longchar-ia ashi.

Tanungba district ajaki tekaratiba U-WIN angazüka mapatenzütsü imlar. Linük nung Aug-Oct 2023 nungi district ajak nung 0-5 tanurtem aser mashisa tetsürtem atema IMI 2023 indang 3 rounds maparen inyaktsü lir, ta Dr Imkong-isa ashi.

## NSDMA-i tsüngsang majungtsü metetdaksür

**Dimapur, June 16, 2023 (TYO):** Tzüngluruwa aruba ajanga Nagaland nung taruba hopta tzünglu kanga arutsü imlar ta NSDMA, Home Department-i metetdaksüogo.

June 16 nungi 24, 2023 tashi state kübok tesem aika nung mepet agi süpangtsü aser tzünglu kanga arutsü. Iba mapang Peren, Dimapur, Kohima, Wokha, Zunheboto, Mokokchung, Mon aser Longleng nung tsüngmok den tsüngi aitsü

aser tzünglu kanga arutsü, ta NSDMA-isa ashi.

June 16 nungi 24, 2023 tsüngda Nagaland nung minimum temperature 17°C aser maximum temperature 30°C alitsü.

Iba mapang public kanga kümdanga alitsü ayongzüker. Maneni District Disaster Management Authorities aser tanga line departments-i mapa inyaktsü renema alitsü mepishir, ta NSDMA-isa metetdaksü.

## Pongching nung nisung 45 mim chisem

**Dimapur, June 16, 2023 (TYO):** Longleng district kübok Pongching yimtsüng nung chiyungtsü nung mim chisemer nisung 45 tashi anepaludar.

Parnok kechi nung mim chisem'ar memetet saka Longleng Deputy Commissioner Dharam Raj, IAS-i angong indang sample ka State Public Health Laboratory (SPHL), Kohima nung tendangtsü atema yokogo.

"K e t d a n g s e r t e m i bushisüngdang aodang angong nung mim chisem asütsü akok ta bilemer aser iba jagi tendangtsü bener yoker" ta DC Dharam Raj-i SPHL indang Food Analyst dangi shidi züluba nung shia lir.

Paisa state lab dang jungjunga tendangtsü mepishio. Pongching yimtsüng nung alirtem chiyungtsü nung mim chisemba ajanga nübertem shisabulur aser tebilemstü abener ta paisa ashi.

"Yashi lanur teimba ser nisung telok ka alu nung mapa inyakdang angong den chiyungba sülen iba ya atalok" ta SDO (Civil) Longleng, Throngdiba Tongpi T. Sangtam-i ashi.

"Parnok chiyungba sülen tepok oa aser saksüa shirangtep aser tanü nikonngdang tashi nung nisung 44 tashi district hospital nung anir arua anepaludar saka parnok rongnung kanga mejungi timtemertembo mali" ta Throngdiba-isa ashi.

## Guwahati nung CMHIS kübok Naga nunger anepalutsü ayongzüker

**Dimapur, June 16, 2023 (TYO):** Nagaland state sorkari senso ajak nem universal healthcare services agütsünür ta Commissioner & Secretary, Health & Family Welfare, Y. Kikheto Sema, IAS-i ashi.

Hokolbarnü The Lily Hotel, Guwahati nung Chief Minister's Health Insurance Scheme (CMHIS) indang workshop ka alidang pai iba osang metetdaksü.

Ayushman Bharat PM-JAY kübok madenba senso ajak nem health insurance agütsütsü atema October 2022 nung CMHIS tenzüker. India nung Cashless Universal Health Coverage tenzükerba state mezüngbubaji Nagaland lir, ta Kikheto-i ashi.

CMHIS tenzükerba ajanga November 1, 2022 nungi sorkar mapa inyakertem atema MR Scheme anenogo. Ajisüaka, tesüiba ita ishika khuret balala ajuruogo saka itemji angatetepogo, ta paisa metetdaksü.

CMHIS kübok Employees aser

Pensioners kibong shia nem küm nung Rs. 20.00 lakhs agütsür aser general category nung kibong shia nem Rs. 5.00 lakhs agütsür, ta pai ashi.

CMHIS (General) category ya Ayushman Bharat PMJAY platform den külemi inyaker aser CMHIS (EP) category ya Central Government Health Scheme platform den külemi inyaker, ta Kikheto-isa metetdaksü.

Tetenzük nung CGHS kübok hospitals 1,444 empanelled asü saka Nagaland nungi shirangertemi mozü ki kari dang ao. Ano CGHS package rate kanga ajemba agi mozü ki aikati anepalu masü, ta pai ashi.

Iba khuret koktettsü atema Nagaland Health Protection Society aser H&FW department ketdangtsürtemi CGHS rates dang nungi 30% nungi 60% agi teimba reprangshimogo, ta paisa ashi.

Nagaland aser Assam nung alirtem tsüngda tesentaktep ya

alemlü nungi lir aser anameta asüba agi Nagaland nungi shiranger 50% tema Guwahati nung anepalutsü atema arur. Anungji Guwahati nung aliba mozü kitem empanellement atema tongti süa inyaktsü, ta Kikheto-i metetdaksü.

Kikheto-isa mozü kitem dang shiranger nem quality services tajungtiba agütsütsü mepishi.

"Nagaland sorkari senotsü reju nem sentsüh magütsüba mali aser ita 1 indang Turn-Around-Time tsüngda Hospital bills/claims menoktsü. Anungji mozü kitemi Naga nunger shirangertem tajungtiba nung anepalutsü mepishir" ta paisa metetdaksü.

Iba workshop nung Guwahati nung aliba mozü ki tajung aika dena 20 nungi teshimtet nübotem aden. Sentong nung Joint Director, H&FW and SNO, NHPS, Dr. Kika Longkumer-i tesentepertem pelaa agizük aser Medical Officer, Guwahati, Dr. Chenjei Konyak-i anküp tepela o jembi.

## Nagaland sorkari Schedule of Employment kübok DWs dendaktsütsü

**Kohima, June 16, 2023 (TYO):** Nagaland sorkari Schedule of Employment kübok Domestic Workers (DWs) dendaktsütsü aser parnok asoshi minimum wage latettsü atema mapa inyakdar.

Hokolbarnü International Domestic Workers' Day amongdang Assistant Labour Commission (ALC), Kohima, Zaremo Kikon-i iba osang metetdaksü.

Iba sentong ya Ferrando Domestic Workers' Alliance (FDWA)-i Centre for Development Initiatives (CDI) Guwahati, Assam kübok ayongzüka agi.

Iba anogomung nung CDI-i state sorkar dang Nagaland nung Schedule of Employment kübok DWs dendaktsütsü aser Domestic Workers asoshi minimum wage latettsü indang memorandum agütsüba atema langzüdang "tesüiba nunga kasa temepishiba

ya Labour Department nem agüja lir aser iba ya shisadanga sülen sorkar dangi benogo" ta Zaremo Kikon-i ashi.

"Sorkari ibaji asadangtsü aser State Advisory Board-i ashiba angar lemtet ka agitsü. Schedule of workers nung DWs dendaktsütsüji tongtipang ta onok angatetogo aser mapang tatsüka tsüngda iba mapatenzütsü imlar" ta paisa ashi.

Unorganized sector aser Child Labour (Protection and Regulation) Act yanglushidar saka Law Department-i ano mereprang lir, ta paisa shisem.

E-shram portal ajanga Nagaland nung unorganised workers 219000 tema tenüng zülüokogo aser Kohima kija nung informal/unorganized workers 26300 shi lir, ta Zaremo-isa metetdaksü.

Nagaland Chief Minister dangi memorandum ka züluba nung CDI Director Sister Rose Paite-i "DW

ya alima nung jenjang dalangtiba inyakba mapa ka lir aser informal & unregulated sector nung shilem ka lir saka parnok ya nija kidang dang inyaker aser workers ama majitet" ta shia lir.

Parnok ya mapa inyakertem ta züngshir aser parnok mapa ya dignified work ta magizüker, ajisüaka rongsenketzüng nung parnoki shilem tulu agir. Parnok teimbaka mazüngertem lir aser shia metetba kangabo mali, ta Sister Rose-isa ashi.

"CDI-i DWs tashi itdaktsütsü atema tenangzükerba agia mapa inyaker aser parnok temeten, akhüm atema ozüng latettsünür. Kohima nung domestic workers 928 tenüng nung Chief Minister dang Schedule of Employment kübok DWs dendaktsütsü aser parnok asoshi Minimum Wage latettsütsü mepishir" ta laisa metetdaksü.

## Mokokchung nung District Court Complex lapokogo

**Mokokchung, June 16, 2023 (TYO):** Chief Justice of Gauhati High Court, High Court of Assam, Nagaland, Mizoram & Arunachal Pradesh, Justice Sandeep Mehta-i June 16, 2023 nü District Court Complex, Mokokchung online (virtual) ajanga lapoktsüogo.

Iba mapang Justice Kakheto Sema, Portfolio Judge of Mokokchung District aser R. Ramakrishnan IAS, Principal Secretary, Department of Law & Justice Govt. of Nagaland na liasü.

Iba ya department asoshi mapang talangka nungi kanga dang nungdakba ka asangsang ataloker.

Tanü iba sentong nung Justice Kakheto Sema-i jembidang, Mokokchung nung District Court Complex yangertetba ya jangratemsüka aser nübertem asoshi okaba inyakyim tsütsü ibai

otsütsü ka asütsü, ta ashi. Tanü iba ki yangerba ajanga ochi obendanga ametba den nisung shia temeten wazüka ayutsü aser lokti telungjem asoshi bendanga agütsüshir, ta ashi.

Mokokchung nung district court complex amenokba ajanga nisung shia dangi ochi obendang agütsüba maparen nung tesem kecha tebendang makai arok sakuku awajemtsü imlar, ta paisa ashi.

India sorkari Nyaya Vikas sentong kübok iba ki asütsü atema sen teperi agütsüba den Nagaland sorkari state meyong tagütsütsü aliba (share) 10% sen inoktsüba den iba ki yangertsüa nungdakba maparen balala nung yariba, aser Nagaland CAWD Executive Engineer Er. Sungtiba Amer aser par külem staff-temi iba ki yangerba nung shilem junga agiba asoshi

pelaba olen ka Justice Kakheto-isa metetdaksü.

Iba ki ya December 2016 nungi tenzükerba June 2023 nung süzüker. Sen ajak agi (total project cost) 869.34 lakh intoka yanglu. Iba ki nung kitem 6 - basement, ground floor aser 1st floor nungi 4th floor tashi atongtepa tua lir. Mokokchung Town Baptist Arogo (MTBA) Pastor, Rev. Ponen Longchar-i iba ki meshiteta sarasademtsü.

Sentong nung Department of Law & Justice, Principal Secretary - R. Ramakrishnan IAS, Mokokchung Deputy Commissioner - Thsuvisie Phoji NCS, Principal District & Session Judge Mokokchung - Somet Chang, Mokokchung CJM - W.V Patton, Nagaland CAWD Executive Engineer - Er. Sungti Amer parnokia shilem balala agia liasü.

# Straightway Hr. Sec School Mkg pur summer camp akar



Mokokchung, June 16, 2023: Straightway HSS Mokokchung pur summer camp sentong akaba mapang tangokba noksa nung angur.

**Mokokchung, Aami/June 16 (TYO):** Straightway Higher Secondary School Mokokchung pur June 16 nungi tenzüka anogo ananü atema Spiritual Retreat sentong ka "Rooted and Established in Love" - Ephesians 3:17 omen dak rangloker parnok school campus nung kadaki. Summer Camp ya par school pur kümshi ayonga akaba sentong ka lir aser ibai tongtipangsa yangji azünger kaketshirtem Tsüngrem dangi

anasa anir arutsü aser Tsüngremji pei Kibur aser kümtedakba ta agizükdaktsüsü nükjidong nung akar. Iba sentong nung Camp Director-ji SCMC Missionary - Süngkümlamba lir, Tsüngrem osang abener aser shisalen sayurtemji; MTBA Youth Mentor - Chubawapang, UESI Staff Worker - Limasangla, Khensa CED - Arenchila, Mokokchung Compound CED - Yatetla, Artang CED - Ayala aser Counselor ji SCMC Home

Evangelist - Alem Imchen lir. Iba camp nung campers noklang pezü (400) dak tali jangrabangraa shilem agidaki. Tanep iba Camp tenzüka sentong tongmelang ka agidang SHSS Principal, Sentiyangla, SHSS Vice Principal, Tianaro aser Missionary Süngkümlamba parnoki shilem balala agia kaketshirtem ajungmesoa liasü. Anogo ananü iba camp akadang Tsüngrem o den kentenmenü aser asaya tapu balala asaya-amungtsü.

# Assam Rifles temi state nung sentong balala ayongzük



**Dimapur, Aami/June 16 (TYO):** IGAR (North) kübok Assam Rifles, Kohima Battalion ajanga International Yoga Day nüngtem nung June 16, 2023 nü St Mary's Cathedral Higher Secondary School, Kohima nung azünger kaketshir atema o intepba sentong ka ayongzüka liasü. National Anthem tena iba sentong tenzüka, kong class balala nungi kaketshir 12 aliba telok anati iba o intepba nung jangrabangra shilem agia liasü. Iba sentong nung kaketshir 350 aser tesayur 13 dena liasü. Tereprangertem asoshia iba sentong ya mezüngbuba liasü. Iba o intepba nung 'Yoga vs

Physical exercises' onük nung kaketshir temi pei tangatetba lemsatepa liasü. Terepranger tema temolung süa o intepba sülen Yoga team nem takok konang agüja liasü. Takok angur nem Col SBB Sharma, Commandant, 1st Bn

Assam Rifles aser Rev. Father Vemedo Kezo, Principal nati kulizüng kaketshir den sempet agüja liasü. Maneni Assam Rifles temi Red Cross Society ajanga Mon district nung tuberculosis (TB) agi shiranger nisung 40 nem achi-ajemtsü agüja liasü. Shirangertem tashidak koktettsü aser takum tajungba kumdaktsüba nung nüngdakba teyari agütsüsü nükjidong nung iba sentong ya ayongzüka liasü. Iba amala maparen ajanga Assam Rifles temi state nung nüburtem ajungtsü asoshi mapa tajung inyakba sayur.

# CWC züngsemtem atema training ayonger

**Dimapur, Aami/June 16 (TYO):** National Commission for Protection of Child Rights ajanga Nagaland State Commission for Protection of Child Rights (NSCPCR) den lungjemer Child Welfare Committee (CWC) chairpersons aser züngsemtem

asoshi anogo tenet Residential Training ka ayongzük. Iba training ya Nagaland nung aliba district ajunga asoshi alitsü, koba June 19 nungi June 25, 2023 tashi Hotel 2k, Ladies Mile Road, Officers Hill, Kohima nung akatsü, ta sangdong ka ajanga ashi.

# CMHIS atema sen inoktsüba yimya tera melenshir

**Dimapur, Aami/June 16 (TYO):** Finance Department ajanga sangdong ka nung ashiba agi, taoba mapang Department-i sangdong ka nung ita shia Medical Allowance shilem 50 koba tang Name of the Bank : Nagaland State Co-operative Bank Ltd. Name of Account : Nagaland CMHIS Account Bank Account Number : 100310006020764 IFSC : UTIBOSNSCBI Anungji Banks/DDOs/ Treasury Officers/ Heads of SPSUs/ Boards/ Statutory Bodies/ State Corporations ajaki iten sen ya shia aliba Bank Account dangi deposited/ transfer sütsüsüla aser maneni mapa inyaker aser pensioner tem, sen aser deposits/transfer kanga junga anepalua ayutsüla aser osang tejangia ita shia Treasuries and Accounts indang Principal Director nem agütsüsüla, ta sangdong ajanga ashi. Tekalen shia aliba Bank Account ya Joint Savings Account asütsü aser Chief Secretary aser Finance

"Head of Account 8011-00-105-01 - Chief Minister's Health Insurance Scheme" dangi yoker, ibai July 1, 2023 nü nungi tenzüka tsünglanglen shia aliba Bank Account nung yoktsü. Approval aser Cheque agütsüsü atema Nagaland Health Protection Society nungi proposal aruba sülen Health & Family Welfare Department-i Principal Director, Health & Family Welfare ajanga Finance Department nem agütsüsü, ta sangdong ajanga ashi. Head of Account "8011-00-105-01 - Chief Minister's Health Insurance Scheme" kübok balance anünga aliba tekeratiba nung shia aliba Bank Account dangi yoktsü, ta ashi.

# Peren nung adokba elaichi Mumbai-i yok



**Dimapur, Aami/June 16 (TYO):** District administration Peren ketdangsüba kübok Peren district nung adokba cardamom (elaichi) mezüngbuba batch Mumbai nung amenoka aliba company ka nem agütsüogo. Pilot project ama taoba ita elaichi ya gari ana sünga yoka liasü. State alema orr dangalen

spices market peria aliba aluyimer aser FPOs tem dang sayutsü mechi iba mapa ya inyaka liasü. Local entrepreneurs tem iba project inyaktsü asoshi ajungmesoa iba mapa ya inyaka liasü. District nung aliba aluyimer temi amenoka aliba market tesendaktep amshia jenjang tajungba nung iba chiyongtsü ayoktsü imlar.



Assam Rifles temi June 16, 2023 nü Naginimora, Mon nung "Give Blood Give Plasma Share Life Share Often" omen kübok World Blood Donor Day munga liasü. Iba mapang volunteers 62-i azü agüja liasü.

# NEC nung Director (PE) ka deputation nung nüngdaker

**Dimapur, Aami/June 16 (TYO):** Recruitment Rules nung mela aliba ama North Eastern Council Secretariat nung Director (Plan Evaluation and Monitoring) post ka deputation (short-term contract densema) atema ketdangsür tetemtsü ka bushir. Itasen aser danga terms and conditions ya DOPT's O.M. No. 6/8/2009-Estt. (Pay-II) dated 17.06.2010 nung ama alitsü. Cadre authorities/Head of

Departments temi temsüa aser molunga aliba candidate tem indang application yoktsü mepishir. Application ya Employment News nung iba advertisement adoker anogo 60 tsüngta Director (Admn) atongtsüla. Eligibility criteria, job requirements, qualifications, experience aser nüngdakba osang tejangia metettsü asoshi NEC website <https://necouncil.gov.in> nung angutsü.



Kutch (Gujarat), June 16, 2023: Cyclone Biparjoy ajanga Kutch district nung tzunglu sashia aruba sülen tzü agi Mandvi jila metsüngbanga aliba noksa nung angur.

### Gujarat nung Biparjoy cyclone lendong mapang nung tanur 707 aso

**Ahmedabad, June 16 (Agencies):** Brihostibar aonung Biparjoy ta ajaba cyclone ajanga Gujarat tziyümkümlen kongshia liasü; nisung asüamaba osang meliaka iba yipru ajanga teraksatsüba jenti liasü aser yimtsüing 1,000 shi nung light mali.

Iba ama lendong mapang nung tetsürtemi kinü tanur 707 aso. Mashisa alir tetsür ajakji tziyümkümlen alir mesüra ali nemzüka aliba tesemtem nung alirtem liasü, ibayongji lendong nungi kümzüksü atema parnok aienshidaksür anepalua liasü.

Gujarat tziyümkümlen aliba districts nungi ketdangsertemi nisung lakh 1 dak tema

aienshidakja liasü. Cyclone Biparjoy agi kongshitsü aliba district 8 nung mashisa alir tetsür 1,171 nungi parnok 1,152 shi aienshidaksü, aser iba cyclone yipru mapang nung parnok rongnung tetsür 707-i tanur aso, ta sorkari sangdong ka ajanga metetdaksü.

Tanur 707 ji Gujarat sorkar hospitals aser health centres nung aso; mashisa alirtem anepalutsü atema sorkar gari 302 aser ambulance 202 amshia liasü.

Cyclone Biparjoy ajanga Gujarat kübok Kutch-Saurashtra region nung light indong 5,100 raksatsü aser yimtsüing 4,600 nung electric

light oadok. Yim 3,580 nungbo light agütsüogo saka tanüingba yim 1,000 jungnüa nungbo tang tashi light mali.

Iba cyclone ajangasa stüngdong 600 shi laodaksü aser ibaji ajanga state highways asem nokdanga liasü. Iba lendong nung nisung 23 yiru saka nisung asüba osangbo mali.

Hokolbarnü Gujarat Relief Commissioner, Alok Kumar Pandey-i, "State-i inyaktetba tulutibaji- tang tashi nung cyclone Biparjoy ajanga nisung ka danga asüba mali. Iba ya ajaki longjemer meranga inyakba ajanga lir," ta metetdaksü.

### West Bengal Panchayat election dak sendakba nung nisung 5 süogo

**Kolkata, June 16 (Agencies):** West Bengal nung Panchayat election dak sendakba rara nung tesüiba ghonda 12 tsüingda ano nisung ana süogo aser ibaji densemabo tang tashi nung nisung pongu tashi süogo, ta Hokolbarnü ketdangsertemi metetdaksü.

Brihostibar aonung Murshidabad district kübok Nabagram nung Trinamool Congress local area secretary, Mohammel Haque tepseta liasü, iba sülen police-i iba tatalokba bushisüingdang tenzükogo, ta District police superintendent, Surinder Singh-i metetdaksü.

Iba tatalokba sülen Nabagram nung tensa azüoktsü

atema police aika yoka lir. Brihostibarnü South 24 Parganas district kübok Bhangar nung rara adokdang injang agi yirusang- All India Secular Front (AISF) nung züingsem, Selim Mollah Brihostibar aonung süogo.

Brihostibar anepdang Bhangar nungsa nomination file asüdang rara adoka AISF candidate ka aser Trinamool Congress nung inyker ka na asü. Brihostibar anepdangsa North Dinajpur district nung CPI(M) candidate ka nomination file asüi aodang nisung kari pa khaset.

Panchayat election dak sendakba nung mezüing June 9 nü Murshidabad district kübok

Khargram nung Congress party nung inyaker ka khaseta liasü.

Yimtenren tensa asadangertemi, 2013 küm nungi tenzüka West Bengal nung Panchayat election atema nominations mapang teti rara adoker aser azü tokshir, ajisüaka takümsa tamajungba aser nisung-a aika südar, ta metetdaksü.

Tang election agitsü jakdang anojungi nisung aika asüba ya 2013 aser 2018 kümtem nung elections ama masü. Taoba mapang nungbo ruling party den atongtepa tokteper maliasü saka tangbo tanemer party aika aliba ajanga rara tali adoker, ta parnoki metetdaksü.



New Delhi nung aliba Nehru Memorial Museum and Library Society (NMML) noksa nung angur. Iba museum nungja ya 'Prime Ministers' Museum and Library Society' ta melenogo, ta Hokolbarnü Culture Ministry-i metetdaksüogo.

### PM Modi-i June 20-25 anogotem nung US aser Egypt semdangtsü

**New Delhi, Aami/June 16 (Agencies):** Ato kilonser, Narendra Modi-i June 20 nungi tenzüka June 25 tashi nung United States aser Egypt na semdangtsü, ta Hokolbarnü ministry of external affairs (MEA)-i sangdong ka ajanga metetdaksü.

Modi-i mezüing New York semdangtsü aser June 21 nü United Nations headquarters nung pa leniba nung International Day of Yoga amongtsü.

2014 küm December ita nung UN General Assembly-i bangzüing ka agizüka küm shia June 21 ya International Day of Yoga anogomong asütsü, ta sangdonga liasü.

"Iba sülen Ato kilonser Washington DC-i aotsü aser June 22 nü White House nung pa agizükba sülen Tir Biden tena leniba nung senden amentsü. Kasa nikongdang Ato kilonser nungtem nung Tir Biden aser First Lady Dr Jill Biden nati chiyungba sentong ka ayongzüka akatsü," ta MEA sangdong ajangasa metetdaksü.

June 22 nü Ato kilonser

Modi-i US Congress nung jembitsü.

June 23 nü Ato kilonser nungtem nung US tatong Tir, Kamala Harris aser secretary of state Antony Blinken nati ayongzüka chiyungba sentong ka nung Ato kilonser adentsü.

"Official nungdak balala dak alia Ato kilonseri CEOs, professionals aser stakeholders ajurutsü. Paisa yangji alir India nung ajurutsü," ta MEA-i metetdaksü.

June 24-25 anogotem nung Modi-i Cairo yimtii apusoa oa Egypt semdangtsü. Taküm January ita nung India nung Republic Day anogomong sentong nung tongti tejaokerji Egypt Tir, Abdel Fattah El-Sisi liasü, iba mapang nungji pai Modi dang par linük semdangtsü asüingdanga liasü.

Tang mezüing India nung Ato kilonser kati Egypt semdangtsü.

"Tir Sisi den senden amenba dak alia Ato kilonseri Egypt sorkar tongti ketdangsertem, nungtugu kar aser Egypt nung alir India nung ajurua jembitsü," ta MEA-i metetdaksü.



Ato kilonser, Narendra Modi-i US semdangtsü lia America nung alir India tsürtemi Modi agizükba sentong nung shilem agitsü atema renemshidang tangokba noksa nung angur.

### CMP ka nung ajemdaker opposition longjemtsüla: Sharad Pawar

**Mumbai, June 16 (Agencies):** Hokolbarnü Nationalist Congress Party (NCP) Tir, Sharad Pawar-i, BJP anema opposition party temi common minimum programme ka nung ajemdaker longjemtsü nungdak, ta metetdaksü.

Pawar-isa, common minimum programme nung ajemdaker longjemtsü atema pai opposition party ajak dang mepishitsü, ta shisem.

2024 küm Lok Sabha elections nung BJP anema longjemer tokteptsü atema opposition lenirtemi asalentong yangluba mapang ka nung Pawar-i iba o ya jembigo.

Taoba ita ishika tsüingda JDU lenir aser Bihar Chief Minister, Nitish Kumar-i linük tesem balala sema opposition lenirtem aika ajuruogo aser tesüsa June 23 nü Bihar yimtiba, Patna nung opposition party balala nungi lenirtem senden amentsü sentong renemogo.

Maharashtra kübok Jalgaon nung osangbenertem den

jembidang Pawar-i, BJP-i yimsüsü aliba state teimbaka nung BJP sendokogo, saka nüburtemi shimba sorkar chirepdaksütsü atema parnoki inyak, ta metetdaksü.

"State level nung nüburtemi BJP sendokra parnoki (sensotemi) national level nunga yamaji inyaksü," ta Pawar-i ashi.

Pawar-isa, Patna nung ayongzüka senden nungji pai pa tangatetba lemsateptsü, ta ashi.

"BJP nung madenba party ajaki külemi mener common minimum programme nung ajemdaker opposition longjemtsü atema jembitsüla. BJP-i aika nangzük aser nüburtem nem teimla agütsü, saka parnoki kecha meinyak. Tanga lenmang ka sayutsü mapang tongogo," ta pai ashi.

Osang angazükba agi June 23 nü Opposition party temi common minimum programme ka renemtsü, saka iba jakdangji Pawar-i pa tebilemba tama lemsateptsü.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 17, 2023

### Pei ajung asaa latetba ozüng

**T**aoba küm tuku tsüngda India nung BJP teloki aniba yimteni yimsüsü tenzüker tongtibang yimitem nung yimti yimdong tenüng nungi shir Congress mapang jatetba sentong aser luden tenüng tashi aika melenogo. Ano temzüng ozüng tasena ishika bendenlokogo. Item temelenshi ajakji parnoka parnok tangatetba ka nung amendaker inyaker, anungji parnokibo India asoshi tajunga ta bilema inyaker alitsüa akok. Ajisüaka, yimten yimli nung asen mapang asenoki khen yimsüsüsü maongka angudang, asen jakdang yimsüsürtemi jayetba tenüng aser parnoki latetba ozüng ajak pei ajung dang asaa latetra, iba temelenshi aser telemtetbajibo, ashiko, ano asen sülen aruba yimli nung yimsüsürtemi melenshitsuä akok. Ibaji mesüka tang Karnataka state nungbo yaküm 2022 küm latetba 'anti conversion law' agientsü renemogo. Iba kasa ozüng ya BJP teloki yimsü asüba state-tem nung lateta lir. Atangji, iba ozüng nung tamajung kecha shia mali, kechiyong nisung shingaia shinga tashiyim amshia mesüra sübokrem amshia tamangba yimsü melendaktsütsü memelar. Ajisüaka, iba ozüng latetba shitakba nükjidongjibo, talisa, limapurtem Khristan yimsü dangi memeyipdaktsütsü nokdangba mapa ka lir, kechiyong Khristan-temi temeim mapatem inyakba ajanga limapurtem Khristan akümba ya Khristan-temi mesüzüka kümdaktsür ta aija tongloktsür aser tepuokdaka ayur. Iba ozüng ya mesüka ano state kar nungbo nashi shi mayoktsü aser machitsü tashi temzüng ozüng lateta lir. Item ajakji pei ajunga asaa inyakba aser latetba mapatem lir, anungji tang Karnataka nung amaji kodang tangar teloki yimsüsüsüsa yimli arudir, idangji tanü latetba temzüng ozüngtemji agientsü. Ibaji dang masü akhidang nungtugu lenirtem bilemtettsü atema yimti yimdong aser tongtibang tesemtem agi parnok naroküm kümer putusa putu tetshia aliba tenüngtem pei mapang pei tashi amshia melenyonga aobaji, ashiko, tangar yimli arur itemjia ano melenshiyonga aotsüa akok. Tanü yimsüsürtemi, koba telok nungi südirsüaka, yimsüsüba yimli aser mendenji teti atema masü ta angatettsüla. Aji oda, aseni asen yimsüsüba mapang asen jakdang yimsüsürtemi asen telok aser asen kin nungi masütsüa akok, saka par mapang parnoki inyakba mapatemji akümstüba wazüka yutsüra, asenok sülen arur yimsüsürtemi asen mapang aser mapatema akümstübuttsü. Asen lima nunga 2004 küm mapang kabo Kohima nung Indira Gandhi Stadium ta jaloka amshia aliba tenüng ya melennüa ken o adokba angashiogo, kechiyong iba mapangji linük nung BJP teloki yimsüsüba mapang liasü. Aji oda, teyari tilaka aginü dang BJP lenirtem peladaktsütsü atema Indira Gandhi tenüngji melennüa bilem südi. Ajisüaka, ajungyonga majungyonga Indira Gandhi-ji Congress prime minister masü India prime minister liasü aser la tenüng nung Nagaland nung stadium ka yanglutsü tenzükbaji, asenoki dang mapang shitak nung merenemtet dang ashi, kuli tajung alitsü. Iba tangatetba nung Naga nung lenirtem kari ashishitepba ajanga tanübo Indira Gandhi tenüng nungjisa iba stadium kanga junga renemer amshidagi. Atangji, BJP teloki ashiba ama Congress teloki küm 70 nung meinyaktetba mapatem aika taoba küm 14 tsüngda metsü-semerben agi teimba aser tajungba inyakteta lir. Ajisüaka, tang yimsü tesüdak purtemi bilemttsübaji taoba küm 70 nung kechisarina nungdak mapatem aika inyaka toktsüba agidang tanü putu nung alirtem timmedemi maparen aika jet jet ta tongtepratepa inyakteter. Aji oda, kechi mapa südir süaka tenzükttsübaji tasak aser tenzükerbo metenloka tuluba aser tajungba inyakloka aotsübajibo kanga tasakbo masü. Item ajakji bilemdanga, shir yimsüsüba mapang südir süaka alima mesama tashi aseni dang yimten yimli ajak amokbanger alitsü amai mebilemi, tamalen pur indang senmang amanger amai bilema akümstübu agütsütsü aser tarutsü purtem asoshia bilema mapa ajak nung tatishitsü tajung yutsütsü bilema yimsü sütetra, iba jagi dang pei lima aser nübortem rongnung teti kati ka akümstübutepa putepa alitsü. Ajioda, democracy asüba agi yimten telok balala tentetter yimsüsüsü rakteper dang ashi, yimten telok shinga tsükchir masü saka ajakji pei lima aser nübör meimertem dang lir.

## OLEMSABANG

### Yi ajemba tajangzük anguba aser teraksa adokdaktsüba indang tatsüka lemsateper

R. Imkong Lkr, Aolijen Mepu (Unmga) Mokokchung

(Yashi adok nungi...)

Yangi ano asen tetsü aser tebou mapang nung yi mozü ngutetba indang otsü asenok ajaki angashir alitsü ta amanger, saka iba yi mozü ngutetbaji shir yimdak aser shir kibongi ngutet ibajibo aikati meshitetsü südi ta nibo bilemer. Kichiba ta süra iba yi mozü nungiang yiji yanglur asünungji ta aikati bielma alitsü südi. Saka yi ya asen lima nung tang angur masü, saka Nagaland tesem ajaklen angur ta tenük kuli lir. Yi ya Angami aser Chankhesang lima, Tuensang aser Mon lima, Moya aser Tzüen lima ajaklen angur ta kulitem lir. Aser ano Dimapur lima yabo yi talubosa anguba yimti ka ta asenok ajaki meteta lir, aser ano Tsüma lima ajunga nung yi ya talubosa angur. Saka asen Naga lima nung anguba yi yabo (Local brew) ta ajar.

Tanabuba nung yi ajemba ajanga tejangzük anguba mesüra teraksa adokdaktsüba indang olen ka lemsateper. Taoba mapang nung asenok Mokokchung Town nung karbo yi agi mesüper medemer o medemer na tsüngda nung raratepdang kanga mejungi yirur karbo süadokba otsüa angashia aruogo, aser ano karbo jail-i aoba otsüa angashia aruogo. Iba kasa tatalokba otsütemji tanga districtem nunga angashia aruogo, iba dak alaka ano yi jemertemi parnok yi jemnüdang ki jen tajung yanglu akaba aika yokdokba otsüa angashia aruogo. Iba denji karbo apuanina tsüngda nunga balalulaba otsüa angashia aruogo. Aji oda yi ajemba ajanga teraksa adokdaktsüba dak alaka konang nungsang aser tetushi bener arutsübabo kecha nunga mangashika, anungji yi ya khenyongi shia arua majem tajungba ta lemsateper.

Aji oda yi ajemba ajanga teraksatsüba aser maaksü bener arutsüba indang tejen lai nung tatishitsü ka bener arudi. Alemlü tetjen lai putu mapang nung temeshi nisung Noa-i Tsüngremi ashiba angaa rong tuluka yanglu, aser iba rong nungji Noa aser par kinungtsü den par chir asem aser kinungtsütem parnok 8 (ti) tzümetsüng nungi kümzük ta Lipok tapu 7:13 nungji shia angur. Aser tzümetsüng sülen Noa-i tsükmenatsü lu ayim, aser pai iba nung jagi tsükmenatsü yi yanglua ajem, aser pai iba yi ajemba ajanga mesepadok aser mangsa ser süki nung mejanga ontaka liasü ta Lipok tapu 9:21 nungi shia angur. Iba ama yi ajemba ajanga pai pa mangsa ta memeteti ontaka mejanga alibaji maaksü ta memeteti liasü. (one did not know (knew) himself felt ashamed of his nakedness).

Tanabuba nung ano yi ajemba ajanga taküm nung mamatetba timtem aser teraksa pei dangi bentsür aruba tasen lai nung tatishitsü ka angur. Aji oda Herod chuba asoba anogo donga arudang chubai benjung tuluka ayongzük, aser par chuba jamitem kanga sentsüwangshia yi agi longsotepa jemtepa alidang Herodia jalai chuba kanga peladakja meraketdakja tsüngsanga sayu. Anungji chubai jala dang ashi, oda nai kechisa meshidir ni aji agütsütsü mulunga lir, oda kü yimli tesadang ka tashia agütsütsü mulunga lir ta nangzuka liasü. Kodang iba tenangzükbaji Herodia-i angashi, lai lar jala dang ashi, oda chubai nangzükba ama aousu ka nung Yohan baptitsüba kolak meshiang. Anungji jalai chuba dangi or iba o ji ashi, idangji chuba kanga aoksa, aser timtemdaktsü, saka chuba kati par jamitem ajak mendepa lia nangzükbaji meyzüi inyaktsüsa aküm nung chubai par sepai ka yoka Yohan Baptitsüba tsüngden chiokdak lia pa kolak atang, aser tekolakji bener oagi jala nemji aousu ka nung agütsü. Mathi tapu 14:6-10 tashi nungji iba tatalokbaji shia angur.

Tatempa yangi ano olen ka shisemer, oda nisung kar dakbo teti agi ain tamajung keta lir aser parnok amala denji kari o tajung ka jembü nunga sünga meyiper yangjia tai ka angateter aser ain adoka tang alir. Item amala nisung denji kechi komala o ka anga mejembir, oda ashitsü agi ibala ama nisungtem dakji atakatem kaoba tilakabosa keta alir ta angatettsüla, aser pa mesüra la atenba lokdi (saka lokti ta mamshitsüla) ka nungji teti agi petsapronga rongrongshirong adoka tang alitsü. Anungji laishibaiashir ne ain adokba manung anü teludaktsü. Efesa 4:26 Aji oda nisung ka dak teti agi ain adoka tang aliba sempetji yi kanga mejungi ajemer nisung ka den kecha tebandang mali ta metetdi.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Impur nung Area-Wise staff notation training ayonga agiogo



**Impur, Aami/June 16 (TYO):** Area-Wise staff notation training ABAM Zone 1 & 2 asoshi Impur nung June 13-16, 2023 anogotem nung kanga takok ngua agiogo; ajak agi Arogo 25 nungi nübo 69 arua iba training nung aden, ta ABAM Executive Secretary, Rev. Dr. Mar Pongener-i sangdong ka ajanga metetdaksü.

Tanü putu nung kentenba ajanga Tsüngremer kulisüba mapa nung shilem tulu agir asünung, Tsüngremer wadang nung ken ya shilem tulu ka kümogo. Ken koda tongtipang, ibaji angateta

ABAM Church & Mission kübok music ministry ajanga 2022 küm nungi tenzüka ken dak aketba tesayuba balala agüja arudar. Tang tashi nung ken jangrartem noklang aikati tangazükba aika ngua joko Arogotem nung kentenba nung lirumedema atenba ajangshia arudar.

Tan agiba training ya taküm küm agiba rongnung pezübuba aser tatembangbuba liasü.

ABAM ajanga iba training nung adener ajak dang pelaba den maneni pei Arogo nung tekülem mapang lirumedem kentenym kati bener arutsü

tamang ayur. Ano Diphupar B Baptist Arogo dang Zone 8 & 9 asoshi sentong agitettsüsa tesem melaba asoshi pelaba lemsateper.

ABAM ajanga Mrs. Asenla Longchar, Coordinator, Music Ministry, ABAM, shibai iba sentong la tapupang nung bener takok ngua agiogo, la dang pelaba den külemi Tsüngrem nungi temoatsü meshitsür.

Tsüngremi maneni ABAM Music Ministry ABAM Arogotem ajak nung lirumedem kentenym bener arutsü asoshi moajangma ta sarasademer.

## Manipur nung Khristan lenir kati Khristantem yaritsü mepishir

**June 16, 2023:** Manipur state nung Khristan lenir kati sarasadem aser temeim balala ajanga Khristantem yaritsü mepishiogo, kechiyong state nung kin kati par nüburtem tepseter aser tekülem kitem raksatsür, ta International Christian Concern (ICC)-i metetdaksü.

Manipur nung Khristan lenir jagi, Meitei kin-i Kuki aser Zo kin nungi tai maket tetsürtem, tanurtem, pastor tem aser sorkar mapa inyakertem tepseter, ta metetdaksü.

Iba rara anendaktsütsü atema sorkari kecha meinyakba den külemi parnoki Hindu tribals pusema inyaker, ta Khristan lenir jagi metetdaksü.

"State Chief Ministry, N. Biren Singh aser MP, MP Sapam na leniba nung Meitei Leepun aser Aramba Tenggol-i inyaker aser State Police den Meitei Army senteper minority Kuki nung tashiyim amshia raksatsür aser tepseter. Khristantem kanga timtemedar," ta Khristan lenir

jagi tezüluba shidi ka ajanga metetdaksü.

"Meitei Hindu nung den Manipur State Police aser India Army temia Tenla kitem aser yimtsüngtem rongdoktsür, aser ibaji Meitei officer ka lenisüba nung inyaker," ta paisa metetdaksü.

Tang tashi nung Manipur nung Khristan 147 tepsetogo aser 220 yiruba den külemi nisung 58 samaogo, ta pai metetdaksü.

Yimtsüng 170 rongdoktsüogo aser par organization-i tentettsüba Arogo 17 takoksa anguba den ki 4,581 aser Khristan office 93 rongdoktsüogo, ta pai metetdaksü.

June 6 nü shidi ka ajanga Zomi Students' Federation-i, Tenla ki 317 rongdoktsüogo, rara ajanga nisung 100,000 talidak makai kümogo aser tang parnok teimbaka displaced persons centers 147 nung jenoka lir, ta metetdaksü.

Meitei kini "scheduled tribe" jenjang takhangba agütsüba nungi rara tenzüka

liasü. Tang Manipur nung kin 30 shi scheduled tribe jenjang nung lir.

Taküm May ita nung World Council of Churches-i, state nung nütsüng shilem 50 aliba Meiteis nung scheduled tribe jenjang ngura Manipur nung teküboktiba jenjang nung aliba tribals nem linük temzüng ajanga tekümzüka agüja aliba tetezü samaadoktsü, ta metetdakja liasü.

Meitei nungeri ST jenjang akhangba anema May 3 nü Kuki nungeri longkak aitba mapang Meitei nungeri longkak aiterem amakba nungi rara tulu tenzüka liasü.

Manipur nung Khristan lenir jagi, pa indang ministry ji tongtibangsa Arogo tasen tentettsüba ministry lir, aser tesüiba küm 10 tsüngda parnoki Manipur nung Arogo 52 tentettsüogo, ta metetdaksü.

"Nenok sarasadem aser temeim ajanga rara agi kongshiba kibongtem aser Manipur nung timtemba Khristantem yaritettsü," ta paisa metetdaksü.

## ANOGO ABEN TSÜNGREM DEN

### Tesülen tajungtiba

T.ken 132:1-10

Ne taküm nung tarongba tejangrabaji kechi? Ne kolok aser temulungjang sünga aliba pungmangji kechi? Dawid chuba pungmangji Kibuba külemdak ki ka yanglutsüba liasü. Iba ken nung Pai iba indang asenok dang ashir. Asenok rongnunga iba ama pungmang akar lidaktsünüali-teyanglur, teraksar masü.

Dawid taküm nung mapang talangba ka sepai ka liasü. Pai Israel nung tsükchirtem nungi kümzüc aser linük nung yimjung bener aru. Saka Pai rara nungi yanglutsüba dangi meyip. Pai noklangnok mertsüng den melentepnü. Pai ashi, "Tsüngrem alitsü asoshi ki ka ni mangu tashi ni aonunga memejangtsü".

Saka Tsüngremi Dawid tejangraba tulu aser temeshi madalokdaksü. Solomom, Pa jabasoiang tekülemdakji yanglu. Tamasabo Dawid mepelai liasü saka Pai ashi, "Ibai Tsüngremi mulungba süra ni agizüktsü". Idangji kanga tesüngmangtsü mapa inyak: Pai tesülen putu yaria tekülemdak yanglu. Dawidi Sentongji agütsü aser hon, taripi, senti long aser merang sen million aika jenjang yutsü.

Asenok sendong aser tejangrabatem ajakbo asenok mapang nung mataloktsü akok, saka asenoki tanabuba tajungtibaji inyaktsü akok. Tsüngremi asenok alizüng matalokdaksüra, asenoki pa alizüng tongtettsü langa inyaktsü akok, Pa alizüng tongtettsü asoshi asenoki kar yaridi. Asenoki agütsüdi. Asenoki asen shisatsü agütsüdir, asenoki ajungshidi. Asenoki ajak inyaktsü makok, saka asenoki langkabo inyaktsü akok.

Ne pungmang Tsüngremi mulungba nung matalokra, ne sempet aser rongsen ajanga kar pungmang atalokdaksütsü kari yariang. Kodang nai tangar nungsang anguba dang nungi Tsüngrem sentsüwangshi asoshi tali bilemdir Tsüngremi na Pa sentong ataloktsü asoshi lemanng timba nung amshitsü.

Tsüngremi anguba lemanng tajungtiba nung Tsüngremi na amshidakjang.

## Southwest Nigeria nung putir ka khaset



Rev. Charles Onomhoale Igechi

**Abuja, June 16, 2023**

(Agencies): June 7, 2023 nü southwest Nigeria nung mejangjaba telok kati Roman Catholic putir ka khaset, ta Arogo otongdar kati metetdaksü.

Edo state kübok Benin nung Rev. Charles Onomhoale Igechi gari nung toudak mapang nung mejangjaba nisung kari pa khaset, ta Benin Arogo nung tongti putir, Rev. Augustine Akubeze-i sangdong ka ajanga metetdaksü.

Igechi ya yaküm August 13 nungang ordain süa liasü. Pa ya Ikhueniro nung aliba St. Michael College nunga vice principal inyaka liasü.

Akubeze-i, "June 7 nü pa nem mapa lemzüksüba tesem nungi meyipa arudang pa khasetba osang tanep onoki angazük aser pa tasümgangji Ikpoba Hill, Ikpoba Okha Local Government Area, Edo state nung angu. Pa teberem nung inyakba manener," ta injang zübo aika liasü," ta

metetdaksü.

Yaküm Nigeria nung Catholic putir 39 tepseta liasü aser putir 30 puer ao, ta taküm January ita nung security organization, SB Morgan Intelligence-i metetdakja liasü.

2023 World Watch List report ajanga, "Fulani, Boko Haram, Islamic State West Africa Province (ISWAP) aser tangartemi Khristantem maneni amaker, tepseter, amokmerener, tashiyim amshia raksatsür aser sen akhangtsü atema Khristantem puer aoer," ta metetdaksü.

WWL report ajangasa, "Taküm-a Nigeria south tsütsülen Khristan nütsüng teimba aliba tesemtem nung Khristantem amakba tatalokba aika lir. Nigeria sorkariba iba ya yimsü nung ajemdaker inyaker masü, ta ashiba ajanga Khristantem temeden anema inyakba manener," ta metetdaksü.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Rarabangsen**

(n) obang mapu adok, raratepa dang aliba (quarrelsome)  
\* Rarabangsen aliba kibongji alima nung molumi lir.

**Rarararar**

(ad) akhüm taket (dignified look)  
· Asoajen tajungerbo lokti nung rarararar angur.

**OLONG PAITEP # 6548**

1		2		3				4	
				5					
6									
				7	8		9		10
				11					
12						13			
		14			15				
		16					17		
18									
				19					

**TIPIEN**

- 1. Chi kenshiba - (6)
- 5. Kilem nung atongba merang - (6)
- 6. Arem shiruru tesashi ka - (4)
- 7. Nüktzü alu - (4)
- 12. Aibelenba atema o ashi - (5)
- 13. Kibong yongsük - (5)
- 14. Asalentong - (4)
- 17. Mimongzüng - (4)
- 18. Külén masü - (6)
- 19. Aor benjung ka - (6)

**LANGTSÜNGLEN**

- 2. Yangertet - (8)
- 3. Kisüng - (4)
- 4. Maneni - (3)
- 6. Tekolak sobotsü - (6)
- 8. Ya sürbo - (4)
- 9. Yimdangi aru - (8)
- 10. Adenshi - (6)
- 11. T\_\_\_\_\_ü - (4)
- 15. Khu abenba lisü - (4)
- 16. T\_\_\_\_\_ng - (3)

**OLONG PAITEP # 6547 TELANGZÜBA**

**TIPIEN :**

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

**LANGTSÜNGLEN :**

- 1. Tenükjang, 2. Luden,
- 3. Kiochtsü, 5. Lenti,
- 7. Tajangzük, 11. Teronem,
- 12. Sempa, 13. Jahaz.


**NAI-A YA METETTER MA**



**KUSMA GYADI BRIDGE**

Kusma Gyadi apu ya Nepal lima nungbo merang apu talangtiba rongnung ka lir aser iba apu ya meter 135 talang (tall) aser metong nung metre 344 lir. I ba ya Pokhara yimti nungi kilometer 57 shi pilar Nepal anüolen tsütsü lir. I ba apu ya Kaligandaki ayongküm nung lir aser iba apu ajanga külén tsütsü aliba Gyadichour yimtsüng den sendaktepa lir. I ba merang apu ya February 08, 2010 nung lapok.

**Noksa nung meputepi aliba 10 bushiang**



**Manipur police-i Imphal East nung nisung 17 apu**



**Imphal, June 16, 2023**  
(Agencies): Manipur nung tesem balala nung ki rongdoktsür nisung 17 police-i puogo.

June 15, 2023 nü Imphal East kübok New Checkon area tesem nung ki ka rongdoktsüba sülen Manipur police-i nisungtem apu.

Külen, Imphal East nung Union minister RK Ranjan Singh'er ki rongdoktsü.

June 15 nü atalokba dak sendakba nung Imphal East nung nisung 12 aser Imphal West nung nisung 5 puogo ta osang angazüker.

Tanü Biren Singh-i aniba cabinet ajanga state indang tensa meyipa reprangdangogo.

June 15 nikongdang Kongba-Nandeibam Leikai nung mejangjaba nisung kari

Union Minister of State for External Affairs and Education

RK Ranjan Singh'er ki nung mi senoktsü.

Imphal nung Minister Nemcha Kipgen'er ki rongdoktsüba sülen Ranjan Singh'er ki rongdokja liasü.

Yasüing 11:00 ako meta nisung telok ka R K Ranjan Singh'er kidangi nungpoka atu aser mi senoktsü.

Iba mapang Ranjan aser kibong kidang maliasü ta osang ajanga ashi.

**CBI-i SI Junmoni Rabha'er kibong den ajurutep**

**Guwahati, June 16, 2023**  
(Agencies): Assam police sub-inspector (SI) Junmoni Rabha taitüsü keta asüba atema Central Bureau of Investigation (CBI)-i kanga meranga bushisüngdang südar.

June 16 nü CBI teloki Guwahati nung Assam police SI asür Junmoni Rabh'er kidangi ao.

DIG Lovely Katiyar-i aniba CBI teloki asür Junmoni'er kinungertem den ajurutepa sensaksem.

Iba mapang Assam police ketdangsurtemia CBI den yaritepa liasü.

DIG Katiyar-i aniba CBI teloki CBI nü Nagaon district kübok Jakhalabandha nung lendong atalokba tesem semdanga liasü.

Bodbarnü CBI telokisa Assam police CID telok den ajurutep. Iba lendong atalokba sülen CID-i mezüing bushisüngdanga liasü.

Arishi küm 30 tain Junmoni Rabha ya Nagaon district kübok Morikalang police outpost nung sub-inspector inyaka liasü. May 16 nü la indang nija gari nung ta sür lia angu.

**Tripura nung yipru ajanga nisung 1 asü; 2 yiru**

**Agartala, June 16, 2023**  
(Agencies): June 15 aser 16 anogotem Tripura kübok district pungu nung tzünglu kanga aruba ajanga kiojen aika raksatsüogo.

Mopung tashii aonba aser

June 15 aser 16 25 ajunga raksatsü, ki 211 terara raksa aser ki 78 kanga mejungi raksa ta State Emergency Operation Centre-i metetdaksü.

June 14 nü Unakoti district

nung tsüngi aidang ajanga nisung ka asü aser ana yiru. Iba dak alaka ayong tulu ajak nung tzü mesemi ayimer.

Department-i Tripura kübok district ajak nung tzünglu arutsü osang metetdaksüogo.

**Tinsukia nung nisung ashioktsür 3 police-i apu**



**Tinsukia, June 16, 2023**  
(Agencies): Karbi Anglong police-i mapa agütsütsü ta shia nisung ashioktsür nisung asem puogo. Parnok rongnung Tinsukia deputy commissioner indang office nung mapa inyaker ana dena lir.

Police-i DC office nung inyaker Deepak Thapa o

Pradeep Tantiya aser Makum nung Anil Moran nunger apu.

Parnoki nisungtem dang judiciary mapa agütsütsü ta shia tashiyim agi sen meshi ta police-i ashi.

"Hamren police-i bushisüngdang arur Tinsukia nung par asem mapu. Parnoki judiciary mapa atema taila

appointment letter agütsü" ta police-isa ashi.

Par asem dang asüngdangyatsü atema Karbi Anglong district-i anir ogo aser police ket nung anogo asemnü ayutsü temelaba nguogo.

Police-isa par asem ket nungi computer kar puogo.



June 16, 2023 : Greece tzükum anasa migrant tem mena aliba rong ka tzü telungi aluba sülen Athens nung longkak aiter temi banner ka amer aliba noksa nung angur. Ango apurtemi amshiba rong ka sünga migrant tem mener Europe atongtsü merangba mapang Bodhbar aonung tzüyim telungi aluba sülen Greece-i anogo asem mang ayimtsü sangdonga liasü. Iba lendong nung nisung 80 jungnüa asü aser timba samar bushir.

### African lenirtem Ukraine nung 'peace mission' arua lir

**Kyiv, Aami/June 16** (Agencies): South Africa tir Cyril Ramaphosa, African Union mendenpiba Azali Assoumani aser Union of Comoros tir densema African lenir pongu African peace mission nung shilem ka ama Ukraine nung arua lia bomb apokba ola angashi. Parnoki linük semdang tenzükba mapang Kyiv nung tayimtsü amshia amakdang nüburtem kumdangtsü asoshi agütsüba ola (air raid sirens) agüja liasü. Lenirtem ya Hukulbarnü Ukraine Tir Volodymyr Zelenskyy den ajuruteptsü imlar aser iba sülen parnok Honibarnü St Petersburg nung Tir Vladimir Putin den jembishinü akatsü asoshi Russia-i aotsü, aser parnok khen bomb shelter nung atsükoka liasü. "African lenirtemi ozü linük yimtiba semdangba mapang Putin-i Kyiv nung missile tesashi amshia amakba ajanga pa temolung ulishir. Russian missiles tem ya Africa nung nemo sang ka sangoktsünüba lir: Russia-i rara tali aginer,

yimjung masü," ta Ukrainian Foreign Minister Dmytro Kuleba-i Twitter nung zülua liasü. South African presidency ajanga video ka prokshiba nung Ramaphosa ya Poland nung arur Kyiv anasa Bucha area nung train ka nung aruba sayua liasü. Ramaphosa-i aniba delegation nungya Assoumani aser ano Zambia, Senegal lenirtem aser Egypt ato kilonser dena lir. Uganda Tir Yoweri Museveni, Republic of the Congo Tir Denis Nguesso aser Egypt Tir Abdel Fattah el-Sisi nungera aotsü liasü, saka parnok yangji maden aser parnok melen teshimtet nisung yoka liasü. Peace mission yagi tetsüngtai ia yimjung ken o jembitsü merang tenzükba mapang Russia aser Ukraine tsüngta temolung lemtetsü mera balala agitsü nükjidong lir. Yimjung alitsü aser telok balala dang diplomacy nem anidaktsür ken o jembitsü nükjidong nung iba mission

ya lir. Item sentong nung Russian sepaitem Ukraine nungi anizüker aotsü, Belarus nungi tactical nuclear weapons agientsü, Putin dak tenük yoker International Criminal Court arrest warrant mapa kuma meinyaki atatsüba densema lir. Ceasefire ka tenzüktsü aser iba sülen Russia aser West tsüngta jembishinü akatsü, ta ashir. Kyiv-ia rara tangatetep nung anentsü asoshi Ukraine nung li nungi Russian sepaitem ainshitsüla, ta par sentong lemsatep. South African ketdangsurtem aser Warsaw nung Polish ketdangsur tsüngta tesendaktep mejungi aliba mapang Kyiv nung ola tulu adoka apokba ola angashi. South Africa indang News 24 ajanga ashiba agi, Bodhbar aonung Johannesburg nungi presidential security aser osangbener tem mena aliba charter plane ka Polish yimtiba tonga aruba sülen mangatetep adok. (Maneni tapak 8 nung...)

### TENÜNGSANG AGÜTSÜR

Mopungchuket Senso Telongjem (MSTK) aser Ao Temolungtsür Telongjem (ATTK) Kohima ajanga Senso tajungtemi pei inyakba mapa nung temaba jenjang ajangzüksetba asoshi tenüngsang tetushi agütsür.

1. **Er. K. Imnajungba Jamir**, promoted to Additional Chief Engineer under NPWD.
2. **Wb. Meyekokba Jamir**, promoted to Assistant Planning Commissioner, Planning Department, Secretariat.

Tsüngremi nena tenzükba wadang nung ano maneni moajang ta sarasademtsür.

**Sd/-**  
**Wb. Onen Ozk**  
**President, MSTK**

**Sd/-**  
**Ayimpongla**  
**President, ATTK**

### Canada nung bus ka tsükok, nisung 15 asü

**Carberry, Aami/June 16** (Agencies): Canada linük tiyonglen teintet rogotem timba sür telok ka mena aliba bus tilaka aser truck ka tsüktepba lendong nung nisung 15 asü, koba taküm gari lendong tamajungtiba rongnung ka alitsü. Iba lendong ya Winnipeg nungi anüolen tsütsü mile 105 shi pilar Manitoba southwestern tsütsü Carberry jila anasa tongtipang lenmang ana ajurutepdak lemjem nung ataloka liasü. Bus nung mena alirtem ya Carberry nung casino kati aorba liasü, ta osang ajanga ashir. "Gari ana tsüktepba ajanga nisung 15 asüba jangjatetogo," ta Assistant Commissioner Rob Hill-i ashir, shiba Manitoba Royal Canadian Mounted Police tekolakba lir. "Tejashitsüka Manitoba aser Canada ajanga nung lendong tesashi atalokba anogo ka ama asenoki teti bilemtetsü," ta Hill-i osangbener dang ashir. Iba lendong atalokba mapang highway tezülen business ka nung mapa inyaka alisang Nirmesh Vadera-i ashiba agi, lenmang tezülen bus nung mi jangrua aliba angu aser rescue team züngsemtemi mi jangrua aliba gari nungi nisung agitetsü meranga liasü. "Gari nung mi jangrua liasü aser firefighter, medical aser

ajaki parnok mi nungi anizüker aotsü merang," ta pai ashir. Bus nungya nisung 25 shi mena liasü aser nisung ter mozü kidang anepaluogo ta police temi ashir. Gari anaprong indang driver takum lir, ta police temi ashir saka shiba tai ajanga lendong atalokar mashi. Van tulu mesüra bus mesük gari ka lenmang nung engine chisar aliba truck ka anasa mokozü adoka arongba noksa TV broadcasters temi prokshia liasü. Lenmang ya jana, glass tejaksa aser bumper tuluka agi stünger liasü. Ato Kilonser Justin Trudeau-i tweet ka nung asür kinungertem den asükhü lemsatapa liasü aser yirur alirtem asoshi sarasademtsür ta ashir. "Carberry anasa lendong atalokba osang angashia kü molung raksar," ta Manitoba Premier Heather Stefanson-i Twitter nung ashir. Anasa aliba Saskatchewan tesem nunga April 2018 küm truck kati junior hockey team bener oa aliba bus ka nung tsüka nisung 16 asü. Truck anisang ya 2019 nung küm ti tepuokdaki yoka liasü. Canada nung gari lendong tamajungtiba ya 1997 küm ataloka liasü. Iba mapang bus ka Quebec province kübok longren kati lua nisung 44 asü.

### Sudan rara tesashiba akumer, governor ka pua bener oa tepset

**Khartoum, Aami/June 16** (Agencies): Sudan nung ita ana jungnüa raraba linük anüdoklen yimtitem nunga pokloka aoba mapang ka nung civilian tem asüba atema yimjak nung paramilitary Rapid Support Forces (RSF) tenüng asenba sülen regional governor ka tepset. West Darfur state governor Khamis Abakar ya Bodhbarnü tepset, ta pai anir aliba armed group kati ashir, aser nüburtem takum samatsüba asoshi pai RSF aser allied fighter dak tai tongloksür ghonda ishika lir iba lendong ya atalok. Pa asüba osang tejangja ano monguteti lir, saka osang kar ajanga ashiba agi, pa ya RSF temi tepset. Sudan indang army temia

social media nung governor pua bener oa tepsetba atema RSF aija liasü. "Governor tepsetba ajanga RSF temi Sudan nübur ajanga anema mapa tamajung inyakba tabu tasen ka bendenloker," ta army temi Facebook nung ashir. RSF nungi tang tashinung telangzüba kecha agüja mali. Darfur region indang governor Mini Arko Minawi-i ashiba agi, tepseter alisang West Darfur province governor ya television station ka nung interview agir ghonda ishika tsüngta pua bener oa aser tepset. Khamis Abakar-i Al Hadath TV dang, civilian tem tepseter aser linük balala nungi teyari nüngdaktsü, ta Bodhbarnü shia liasü. "Civilian tem tapi agi aika

tepseter," ta pai ashir. Bodhbar nikongdang social media nung video ka prokshiba nung prangbong bena tebur telok ka, kar RSF uniforms agir Abakar apu. Ano video kar nung governor ya alu nung laoa liasü aser pa tekong aser tejak nung zübu liasü. United Nations ajanga Bodhbarnü ashiba agi, Sudan nung rara ajanga nisung million ana dak tema tesem balala nung jenshia lir aser Darfur nung rara tesashiba akumba ajanga meimchir anema mapa tamajung inyaker akumtsü. West Darfur provincial capital, el-Geneina nung RSF aser par den sendaktepa aliba sepaitemi taoba hopta yimti tiyongi aita teraksa tulu agütsü, nisung noklang aika tepset aser yirutsü, ta yangji

aliba activist aser UN ketdangsur temi ashir. Tetsür ter dak tema iba rara nungi jena aotsü merangba mapang parnok kidang tashiyim amshia shi nung medem, ta el-Geneina nung activist aser yangji alirtemi ashir. Tashiyim amshia shi nung medemba ajak amai RSF tenüng asener aser parnok nungi telangzüba kecha magütsür. Sudan nung UN envoy, Volker Perthes-i Mongulbarnü ashiba agi, Darfur nung tensa tamajungba kuma alidang el-Geneina tensa ajanga pa aoksa aser yangji kin kar dak tenük yoker amai ajieter. "Arab militias aser kar Rapid Support Force uniform agir arua ethnic identities nung ajemdaker civilian tem amaker," ta Perthes-i sangdong ka nung ashir.

2000s tetenzüklen Darfur nung ethic African temi longkak aita Khartoum nung Arab nungeri amokbanger aliba sorkari parnok bendanga amshir ta aitsü aser iba mapang kin ajanga samatsütsü meranga rara liasü. Taoba tir Omal al-Bashir indang sorkari yangji aliba nomadic Arab fighter (Janjaweed) nem nok-nü agütsür civilian tem tepsetdaksü, ta aitsü. Iba mapang nisung million aika tesem balalai jena ao aser 300,000 shi tepset aser mapang tatsüka lir item telok ya RSF akum aser 2017 küm sorkari melaba sepai telok ka akum. RSF sangdong ka nung el-Geneina nung rara adoka aliba ya tribal pur tsüngta lir aser ibai taoba sorkar tai lir, ta aitsü.

## Racism atalokdang football asaya anendaktsüner: FIFA tir



**Barcelona, Aami/June 16 (Agencies):** Football nung sentsü aser kin dak rangloker tim masüba mapa inyakba, o tamajung ashiba aser yimya amshiba (racism) khenyongo tatok magütsüta aser jenjang ajak nung referee temi idangjisa asaya anendaktsüta, ta FIFA tir Gianni Infantino-i ashi.

Infantino-i Real Madrid nungi asayar Vinicius Junior ajurua saisapong nung 'racism' indang jembia liasü. Brazil nung football asayar Vinicius Junior ya taoba ita Spain nung football asayadang terepranger temi pa dak tenük yoka liasü.

FIFA tekolakbai iba ama mapa inyaker ya mapa tamajung inyakertem lir, ta ashi aser football ketdangsür temi khuret abentsüta, ta ashi.

Vinicius ya sentsü tanak lir aser season tepiyong Spanish stadium tem nung football repranger temi pa sentsü nung ajemdaker o tamajung shia yimya balala sayuba ajangshia aru, saka pa kumzüksü asoshi referee aser football bodies temi mapa kangabo meinyak.

Taoba ita Valencia nung La

Liga asayadang Vinicius anema o tamajung ashiba ya sempaba mapa tamajung lir, ta Real Madrid-i Spanish State Attorney General indang office nung ashishitepa liasü. Iba asaya nung Real Madrid-i takok mongutet.

"Racism aser sentsü/kin nung ajemdaker bendanga amshiba atema jembitsü kisüing masü saka angatetsüsa temerenshi agütsüta kanga tongtipang lir," ta Infantino-i Barcelona nung Vinicius aser Brazil squad ajuruba sülen ashi.

"Racism lira football mali-anungji asaya anendaktsüti. FIFA competitions nung referee tem asoshi iba maongka ya lir aser kasaji national level densema level ajak nung asaya anendaktsüta aser mera agütsüta," ta Infantino-i ashi.

"Ibai football dak sendakba tebilemsü lir aser asenoki ibai nürburtem tebilemsü lir anungji football nungbo kecha masü ta mejembitsüta. Football nunga asenoki tashiyim agi inyaktsüta," ta pai ashi.

"Stadium aser social media ajunga nung asenoki racists jangjaner. Parnok ya mapa

tamajung inyakertem lir. Parnok ya alima ajungalen stadium telungi maitdaktsüta. Ketdangsür temi item nisungtem ya court-i anir aotsüta aser parnok ajak dang ya ashitsü. Racism ya mapa tamajung lir," ta ashi.

FIFA ajanga task force ka amenoktsü, aser yangji Vinicius-i tongti shilem agia tangatetba tejangja benokdaktsüta, ta Infantino-i ashi.

AC Milan midfielder Kevin-Prince Boateng-i Italy nung timtem ajuruba sülen FIFA-i 2013 kum anti-racism task force ka tenteta liasü. Boateng ya sentsü tanak lir.

Boateng ya task force den mapa inyak, koba Infantino tir shimer ita ishika lir 2016 kum FIFA-i shibang.

Iba mapang task force ajanga khen asoshi par mapa tenük sünga inyakogo, ta FIFA-i shia liasü.

Anti-racism panel shibangtsüba ya aibelen tulu liasü, ta iba züngsem British-Nigerian journalist Osasu Obayiuwana-i Twitter nung ashi.

"Ibai asayamenü ka asü? @FIFacom, Gianni Infantino-i ajungmesoba nung ajemdaker FIFA anti-racism task force shibangtsü, kong nia 2013-2016 mapang züngsem ka liasü, aser nibo July 2016 nung pa dang tashi itshitsü aser tebo (teeth) agütsüta shia liasü. FIFA-i iba mission temolung süa inyakogo ta ashi. Tanü tashi football nung racism lir ta angatetsü asoshi parnok kum tenet agi?"

## Conor McGregor anema ken o benoka lir



**Miami, Aami/June 16 (Agencies):** Ireland nungi mixed martial arts fighter aser taoba mapang UFC champion Conor McGregor-i Miami nung NBA basketball match ka nung tetsür ka dak tim masüba mapa inyak ta tai tongloksüba pai magizük.

Tetsürla indang okatsür kati züluba shiti nung ashiba agi, June 9 nü Kaseya Center nung Miami Heat aser Denver tsüngta NBA Finals asayaba mapang McGregor-i metzü meshiba tesem nung la dak

tashiyim amshi. Arishi kum 34 tain McGregor-i la dak tashiyim agi tepang mesep aser ano tashiyim amshia shi nung medemtsü merang, ta aitsür.

McGregor indang okatsür Barbara Llanes nungi sangdong ka nung item taittsüba ya tiazü lir, ta shia liasü.

Miami Heat aser NBA ajanga iba osang angazüka lir aser bushisüngdang, ta ashi.

"Iba tai tongloksüba onoki meteta lir aser bushisüngdang

tenzükogo. Bushisüngdang matem tashi onoki mejembi alitsü," ta Heat sangdong ka nung ashi.

Shiti nung tetsürla indang okatsür Ariel Mitchell-i ashiba agi, team anaprong aser NBA indang security temi tetsürla ya metzü meshiba tesem kati yok, kong McGregor aser pa indang security guard tema ataa liasü.

June 9 nü iba asaya nung McGregor ya court tezülen mena liasü aser halftime promotional act ka nung shilem agidang pai Heat mascot dak ishoben atsüing. Iba mascot tenüing ya Burnie lir, aser pa emergency room-i aotsüsa akum aser iba sülen mozü agütsür kidangi yok, ta osang ajanga ashi.

McGregor ya NBA game nung terepranger aikati pela magizük aser July 2021 nung Dustin Poirier den tsüngtepdang tetsüing yiruba sülen khen danga tsüngtepa mali. Pai tatemsa takok anguba ya January 2020 nung liasü.

## Community Shield nung Manchester City-i Arsenal ajurutsü

**London, Aami/June 16 (Agencies):** Asaya tabu asem nung takok marok ngur aliba Manchester City-i par 2023-24 season tenzuka Arsenal den August 6 nü Community Shield asayatsü. Community Shield ya Premier League season tenzükba asaya ka lir, ta England indang Football Association (FA) ajanga Hokulbarnü ashi.

City yagi league anaprong aser FA Cup koka lir, aser league runner-up Arsenal-i English champion den Wembley nung asayatsü. Premier League nung Arsenal ya City tesülen point pongu agi tajemba nung tembanga liasü.

Community Shield ya

English football indang annual match ka lir, koba Wembley Stadium nung taoba Premier League season akoker aser FA Cup bena alir tsüngta asayar.

Premier League champions-isa FA Cup koker lira, taoba season Premier League runners-up den asayar.

Taoba kum City aser Liverpool tsüngta Community shield ya Leicester City indang King Power Stadium nung asaya liasü, kechiaser tetsürtem European Championship final kasa mapang Wembley nung asayatsü renemer liasü.

Premier League season tassenba August 11 nü tenzüksü aser iba mapang City-i Burnley den asayatsü.

## Indonesia Open: Rankireddy-Shetty semi-final tongogo

**Jakarta, Aami/June 16 (Agencies):** Hokulbarnü India nung Satwiksairaj Rankireddy aser Chirag Shetty nati top seeded Fajar Alfian aser Muhammad Rian Ardianto na straight games nung tsükdakja Indonesia Open World Tour Super 1000 asayamung nung tebur taren badminton semifinals tongogo.

Ajisüaka World Championship nung silver medal angusang India nung Kidambi Srikanth bo tebur kisüing asaya quarterfinals nung China nung Li Shi Feng den asayaba nung tamakok ajurua tsükogo.

Srikanth ya world no 10 nung alisang Feng den ghonda ka ser minute toku asaya aser 14-21 21-14 12-21 nung tsük.

Iba takok ya ajanga Feng aser Srikanth tsüngta anaben asayaba nung khen-khen koka lir.

Iba sülen seeded tenet buba nung aliba Satwik aser Chirag nati kanga junga asayateta minute 41 nung Indonesia nung Alfian aser Adrianto na 21-13 21-13 agi tsükdakja liasü.

Satwik aser Chirag na ya Korea nung Min Hyuk Kang aser Seung Jae Seo aser Indonesia nung Leo Rolly Carnando aser Daniel Marthin tsüngta quarterfinals nung takok angur den asayatsü.

Maneni India nung HS Prannoy-i Japan nung Kodai Naraoka madak 21-18 21-6 agi takok ngua semifinal jenjang alanzükogo.

## African lenirtem Ukraine... (Tapak 7 nungi...)

Ramaphosa ya Kyiv bushia train nung odaktsü aser pa security kwi yokar memetet aser tayimtsü ya tang tashi Warsaw nung lir.

"Ramaphosa ya Kyiv-i maodang Poland south tsütsü senden ka nung adentsü asoshi pa den security team anir aotsü tanabuba charter plane ka arutsü liasü, saka South African nungertem Warsaw nung aliba Chopin Airport tonga aruaka iba tayimtsü ya maru," ta News 24 ajanga ashi.

"Charter plane tanabuba ya shiri agütsüta liasüar mejangja."

Yangji aliba South Africa nung osangbener temi ashiba agi, Polish ketdangsür temi South African security personnel tem tayimtsü yutsür aotsü memolung aser nok-nü

aser hadir balala bena aliba container 13 pua ayutsü amokmeren.

Iba asoshi Ramaphosa indang security tekolakba, General Wally Rhoades-i osangbener senden ka ayongzuka liasü.

"Parnoki onok menudaktsür. Polish ketdangsür temi tetsükdaktsü agütsür aser onok mezüingmeshia amshir. Parnoki ozü tir takum lendong nung yutsür, kechiaser tanü nikongdang onok Kyiv tonger alitsüba liasü," ta pai ashi.

Kyiv nung tir indang odongtar Vincent Magwenya-i Twitter nung tir kumzuka lir aser peace mission sentong nung aliba ama kanga junga odagi aser South African ketdangsür temi Poland den tayimtsü atema jembir, ta ashi.

## BILEMDANGANG

"O jembir tajungia khen khenbo jembisar."